

四庫全書

子部

# 欽定四庫全書

子部

證治準繩卷二百九

詳校官太醫院醫士<sub>臣</sub>舒岱

編修<sub>臣</sub>倉聖脈覆勘

總校官進士<sub>臣</sub>朱鈐

校對官典簿<sub>臣</sub>郭祚燾

謄錄監生<sub>臣</sub>饒文洲

欽定四庫全書

證治準繩卷一百九

明 王肯堂 撰

外科

肩部

肩疽

靈樞云發於肩及臑名曰痃癰其狀赤黑急治之此令人汗出至足不害五臟癰發四五日逆熅之 鬼遺云

丁疽發兩肩惡血留結內外榮衛不通發成疔疽五日  
腫大令人口噤寒戰十二日可刺不治二十日死 陳  
乾疽腫發起兩肩及兩大臂連脾骨二七日痛不息亦  
不可動五十日身熱不赤六十日可刺刺之無血者死  
或問肩上生疽何如曰此處手足三陽交會之所名  
曰肩疽由風熱鬱結所致或因負重損傷而作服烏金  
散勝金丹活命飲加柴胡桔梗壯實者一粒金丹下之  
老弱者十全大補湯托之

# 肩脾疽

或問肩脾內痛漸至潰爛成瘡何如曰此名太陰疽即蓮子發屬手太陰肺經積熱所致宜活命飲加桔梗黃芪奪命丹勝金丹黃芪木香散選用壯實者八陣散一粒金丹下之赤色者可治青黑者不治喘嗽大渴胃滿脉微者死

## 左右串

或問左右搭串何如曰左肩骨上生疽串於右者可治右肩骨上生疽串於左者難治古有此說愚謂不然攻

注左右者氣血不調陰陽交錯也宜勝金丹活命飲加羌活桔梗壯實者八陣散一粒金丹下之七惡證少何慮難痊元氣虛憊治之何補哉

缺盆疽

或問一人年六十肩前陷中生疽寒熱大作飲食少進肩背拘急小水不利胸腹膨脹何如曰是名缺盆疽又名鎖骨疽屬足陽明胃經手少陽三焦經宜隔蒜灸先服紫金丹奪命丹而惡證退惟苦小水不利投以六一

散而利後服十全大補湯而安若治之稍緩必致潰爛  
是經少血多氣瘡口不合危篤者多矣

### 肩後疽

或問肩膊後骨上生疽何如曰此名上鼠疽即上搭也  
怒氣積鬱所致屬太陽兼少陽經初覺宜隔蒜灸活命  
飲加羌活桔梗柴胡勝金丹紫金丹奪命丹選用既潰  
十全大補湯黃芪木香散人參養榮湯

### 過肩疽

或問肩後夾脊兩邊腫硬疼痛何如曰此名筋疽亦名過肩疽初得寒熱似瘡但腫硬無頭急隔蒜灸服活命飲加羌活勝金丹奪命丹汗之壯實者一粒金丹萬病解毒丹選用

癰癰癰

或問項腋兩乳旁結核或兩胯軟肉處生腫塊何如曰是名癰癰癰屬手少陽三焦經其發緩慢是冷證非熱證也宜用回陽玉龍膏熱藥敷貼服內補十宣散何首



烏散勝金丹選用

腋發

靈樞云發于腋下赤堅者名曰米疽治之以砭石欲細而長疎砭之塗以豕膏六日已勿裹之其癰堅而不潰者為馬刀挾癰急治之 鬼遺云內疔疽發兩腋下及臂并兩手掌中振寒熱血噤乾飲多即嘔煩心悁悁脉盛六七八日診如此可汗不汗死

夾肢癰

或問肩膊下隙内生疽何如曰是名夾肢癰屬手少陰  
心經手厥陰心包絡風熱所致宜服內托黃芪柴胡湯  
壯實者八陣散一粒金丹下之及紫金丹勝金丹選用  
老弱者黃芪木香散人參養榮湯十全大補湯主之

臂部

七

臂癰

鬼遺云垂臂兩處發接骨下臂驚上起如雞鴨卵大皆  
由榮衛不調所為也喜患實處而不透內亦宜急消或

發穴早療 兩臂肘起在接骨下引手至小骨之上發  
癰癰此處雖實柰連大小筋骨舉動不便垂手多墜疼  
如膿深沉徹骨即傷筋脉拳縮不舒搖撮宜急以緩慢  
筋脉藥餌治之 玄機云在臂外為癰在臂內為魚肚  
發在臂上節腫連肩髃為臂風毒宜活命飲加羌活獨  
活桂枝桔梗水酒各半煎服及奪命丹紫金丹勝金丹  
選用壯實有裏證者一粒金丹八陣散下之若漫腫無  
頭服敗毒之藥不能消者宜十全大補湯加桂枝桔梗

托之有嘔吐而數日不食者潰出膿則愈

治驗一人年將六十五月患右臂膊腫盛上至肩下至  
手指色變皮膚涼六脉沉細而微此脉證俱寒乃附骨  
癰也開發已遲以燭針啓之膿清稀解次日肘下再開  
之加吃逆不絕與丁香柿蒂散兩服稍緩次日吃逆尤  
甚自利臍腹冷痛腹滿食減時發昏憤灸左乳下黑盡  
處二七壯又處托裏溫中湯一兩半與服或曰諸痛瘡  
瘍皆屬心火又時當盛暑而用薑附可乎予曰經云脉

細皮寒瀉利前後飲食不入是為五虛沉吃逆胃中虛寒此證內外相反須當捨時從證遂投之諸證悉去飲

食倍進瘡勢溫膿色正復用五香湯數服月餘而愈

機按

此證多屬虛寒此方專用辛熱以治其寒不用參朮以補其虛蓋因吃逆腹滿乃氣鬱壅也想必其人年雖老脈證雖虛而形體頗實非陰虛吃逆比

一揮使臂腫一塊不痛不赤脉

弱嬾食時嘔以六君子加藿香酒炒芍藥嘔止食進再以八珍湯二十餘劑膿成刺之又以十全大補湯而愈次年傷寒後臂復腫微痛乃傷寒餘毒也然無表證但

虛弱耳先用十宣散四劑取參芪芎歸扶助元氣防風  
桔梗白芷厚朴行散腫結肉桂引經破血腫退三四再  
用八珍湯膿潰而愈至冬臂復作痛因服祛風藥反筋  
攣痛甚此血虛不能養筋筋虛不能束骨用加味十全  
大補湯百貼而愈 一女臂患腫潰久不斂寒熱交作  
五心煩熱飲食少思月水不通以逍遙散月餘少可更  
服八珍湯加丹皮香附又月餘經通再加黃芪白斂兩  
月餘而愈 一人臂腫患毒作痛服寒涼藥食少大便

不實子用理中丸二服更以六君子加砂仁藿香再以  
托裏膿潰而愈 凡瘡痛甚者若稟厚有近五十左膊  
外側紅腫如栗子曰勿輕視得獨參湯數斤乃佳數貼  
而止旬餘值大風拔木瘡上起一紅線繞背抵右肋與  
大料人參湯加芎朮補劑兩月而安 一婦臂痛筋攣  
不能屈伸遇寒則劇脉緊細此良甫所謂肝氣虛為風  
寒流于血脉經絡搏于筋筋不榮則乾急為痛先用舒  
筋湯次用四物湯加牡丹皮澤蘭白朮而愈亦有臂痛

不能舉或轉左右作痛由中脘伏痰脾氣滯不行宜茯苓丸或控涎丹治之 一人手臂結核如粟延至頸項

狀似瘰癧此風濕流注用加減小續命湯及獨活寄生

湯更以托裏藥倍加參芪歸朮百貼而愈

機按此條有證無脉認作

風濕流注而治當時必有所見也後用補劑百貼而愈是終不離于虛也

一兒三歲臂患

毒焮痛服解毒丸搽神功散而消

此條證脉不詳當時必有所見

嘗治

臂毒便閉煩躁服五福化毒丹亦効若膿成急刺用紙

撚醯麻油絛瘡內以膏藥貼之若兒安靜不必服藥候



有膿取去仍用絛貼 一人臂患疽脉數飲槐花酒一

服勢頓退再與金銀花黃芪甘草十餘服而平

槐花治濕熱之

功最為神速胃寒不宜過劑

尹老家貧形志皆苦自幼頽疰孟冬

于手陽明大腸經分出癰第四日稠膿臂外皆腫痛在手陽明左右經中其脉俱弦按之洪緩有力此得自八風之變以脉斷之邪氣在表飲食如常大小便如故腹中和口知味知不在裏也不惡風寒只熱躁脉不浮知不在表也表裏既和邪在經脉之中故曰凝于血脉為

癰是也癰出身半已上故風從上受因知為八風之變

而瘡只在經脉之中法當却寒調和經脉中血氣使無

凝滯可愈矣宜以白芷升麻湯

機按此方舉一身而言故陽明為一身之中若

以各經言之而陽明亦自有表裏中三等之劑太陽亦有表裏之中之方餘經皆可以類推也

一人

年踰三十臂患疽潰而不痛膿稀脉弱丹溪曰疽潰深

而不痛者胃氣大虛不知痛也東垣曰膿水清稀瘡口

不合氣血俱虛也理宜大補彼不聽服消毒藥氣血愈

虛遂不救 丹溪曰纔見腫痛叅之脉證倘有虛弱便

與滋補氣血可保終吉又曰潰瘍內外皆虛補接為主  
茲則見善不從自用已智寧免死乎 一人年踰四十

臂患毒焮痛作嘔服托裏消毒藥愈盛予用涼膈散二

劑頓退更以四物湯加芩連四劑而消

機按此所謂腫瘍熱毒攻心而

作嘔也

一人兩臂腫痛服托裏藥日盛予謂腫屬濕痛

屬火此濕熱流注經絡也用人參敗毒散加威靈仙酒

炒黃芩南星數劑漸愈更以四物湯加蒼朮黃檗桔梗

二十餘劑而消

按此托裏藥日盛故改作濕熱治也

一尚書左右欣爛

入些醋溫塗敷患處

赤葛膏 治病藕節及臂臑腕掌等處結毒

赤葛根皮 山布瓜根 山蘇木 山樟根皮

紫金皮 赤牛膝 赤芍根 赤毛桃根 用皮搗

極爛糟炒敷塗患處

敷病肌石蜃藥

用山樟子葉搗極爛糟炒縛之又用根煎酒服之

臍癰

俗名病藕包

臑臂表裏俱腫痛赤色惟肘節處差小故名藕包以內  
外分陰陽俱如上法

泥油膏 治病藕包

用塘泥一分桐油三分共和之以鴨毛掃時時塗勿令乾  
二瓜散 治病藕包

右用山布瓜根天布瓜根二物砍爛入米醋少許和煖  
塗之

或問手臂陽明經分生瘤初如粟米漸大如赤豆痛不

可忍旬日大如胡桃桃枯紫何如曰此名骨蠱疽若毒  
遊遍身拘急發搐嘔噦不食冷汗自出滑泄煩躁脉亂  
者死犯房勞怒氣者死一人患此證一月之後遍身攻  
串口吐黃水穢氣滿室既而嘔吐膿血旬日而亡其人  
三四日前尚進飲食人與沐浴扶起皮肉俱爛患者不  
信醫者不識以致隕身此由七情不和積怒積憂積熱  
所致真元虛敗不能勝邪故也縱有丸丹天命而已惟  
智者防患於未然急服黃連消毒散勝金丹烏金散活

命飲加羌活選用治之稍緩七惡證多者必死也 按此證發之暴死之速乃陰虛極而火獨光之故前藥不滋化源而揚湯止沸其能濟乎

手部 八

手發背

俗名蜘蛛背

鬼遺云兩手背發癰疽初生如水刺無頭腦頑然滿手背腫滿後聚毒成瘡深入至骨而為發手背此屬五種皆發毒之類也 手背腫毒乃三陽經風熱鬱滯而發

宜服活命飲加芩連山梔桔梗升麻寒加桂枝熱加薑黃水酒煎服有表證者紫金丹烏金散奪命丹汗之有裏證者一粒金丹八陣散下之老弱者宜大補之劑

柿根膏 治蜘蛛背

右用紫背草孤柿子根皮同砍爛糟炒縛之又方加  
岩松子或單用亦可

手心毒

手心結毒焮赤腫痛俗名病穿掌又名穿窟天蛇又名



貧子孟若偏於掌邊者名穿邊天蛇又名穿埂天蛇此  
手厥陰心包絡積熱所致初宜隔蒜灸之以泄其毒服  
活命飲加桂枝薑黃實者量表裏為汗下於紫金丹奪  
命丹烏金散一粒金丹選用既潰參芪大劑補之

蜈蚣散 治病穿掌

穿山蜈蚣 花心蜈蚣 背子蜈蚣 山蘇木

飛天蜈蚣 金頭蜈蚣 酒罈蜈蚣 赤牛膝

臭不待根 紫背草 紫金藤 用酒煎服不飲酒

人水煎入少酒和服又用過路蜈蚣溪女葉煎水浸洗

又方

穿山蜈蚣 雞屎子 金腦香 紫金藤 水煎入酒和服

敷穿掌穿板藥

仙人掌根 雞屎根皮 赤葛根皮 葛合根

山布瓜根 背子蜈蚣 山樟根皮 赤牛膝

落鴉鎗根 天布瓜根 山枇杷根皮 紫河車  
紫金皮 同搗爛入醋少許和塗患處

又方

仙人掌根磨米醋煖塗傅又用藜蘆子煎醋薰又用  
零香子煎水浸洗

浸洗方

石楠藤 赤牛膝 赤麻蕒 八角茴香 赤蕒子  
九節香 豬屎蘇 穿山蜈蚣 鉄菱角 含笑葉

鉄梗子 落鴉鎗 山蓼葉 同煎水薰浸淋洗之

潰爛者用搽末

舊飯筲燒存性為末拍油掃患處次搽末或用生肌

散亦大効 飯筲要用農家者取其日日貯飯藏氣者効

虎口疽

虎口結毒焮赤腫痛名合谷疽又名了刺毒又名擘蟹毒又名手叉發又名病蟹又此手陽明大腸經風熱積

毒之所致也初覺宜隔蒜灸之服活命飲加桂枝薑黃  
桔梗升麻水酒煎服壯實者量表裏為汗下老弱者十  
全大補湯十宣散托裏散中選用 五指叉處結毒焮  
腫者俗名鴉叉

草靈散 治病蠟叉

用薛叉草

又名薛叉穢

搗極爛酒炒縛之

又方 山馬稍根皮砍爛糟炒縛之

又方 宿地薤白根葉砍爛酒炒縛之

又方 檉子葉砍爛糟炒縛之又以小葉淨瓶子煎水  
熏洗亦効

又方 碌礱草葉砍爛酒炒縛之又以梗煎水浸洗

落鴉鎗散 治鴉義

落鴉鎗 大金錢 羊蹄菜 水楊柳根

右砍爛糟炒縛之

又方

落鴉鎗 紫金皮 山布瓜根 天布瓜根 同搗

爛糟炒縛之

又方 落鴉鎗根搗爛糟炒縛之

又方 落鴉鎗根天布瓜根砍爛糟炒縛之

腕癰

手屈之處結毒焮赤為手屈發俗名手牛押屈此手三陰經風熱聚毒之所致也治法同前 一人年四十手

腕生疽面目手臂俱浮腫飲食全不進者七日矣惟飲水數升神思昏憤小便不利時值盛暑穢氣逼人惡證

疊見不應。用藥姑以玉樞丹加蟾酥塗之。出蛆。合許膿升許。惡證悉退。補養而痊。

紫金牛膝散 治手半押屈及脚上一切腫毒堆核焮痛者

紫金皮 赤葛根皮 赤毛桃根 山布瓜根  
赤牛膝 魚銅根皮 天布瓜根 落鴉鎗根  
同砍爛糟炒熟縛患處

又方



魚桐皮根 落鴉鎗根 紫金皮 同砍爛糟炒  
縛之

又方

落鴉鎗 葛合根 馬藍草 天布瓜 山蘇木  
紫金皮 赤毛桃 赤牛膝 芙蓉葉 山布瓜  
赤葛根 魚桐根 李子根 同搗爛糟炒縛之  
久不退加山樟子葉及根皮

手大指疽

手大指頭發小點如粟漸大如豆或如桃李或青或紫  
乍黃乍黑乍白或痒或麻木不痛或大痛徹心此名調  
疽屬手太陰肺經積毒毒盛者宜截去之四日刺得血  
膿者生得黑血者死急服烏金散紫金丹汗之壯實者  
一粒金丹下之毒氣攻心嘔吐不食膨脹者死齒縫出  
血者死 一人患此色黑不痛其指已死今斬去之速  
服補藥恐黑上臂不治彼不信另服敗毒藥手竟黑遂  
不救

天蛇頭

手中指頭結毒焮赤腫痛

或不拘何指

名天蛇頭若有膿裂

開有口唇如蛇頭狀是以名焉屬手厥陰心包絡積熱所致宜服活命飲加柴胡羌活桔梗黃連消毒飲紫金丹烏金散選用雖黑色頑麻潰爛脫指者亦不死

丹溪云蒲公英草清明時節如薺菜狀中開一朵花如菊花者取乾與蒼耳草二味等分為末以好醋濃煎浸洗即愈

蒲公英忍冬酒治天蛇頭極効累驗

見乳癰

世治天蛇頭蒲公英搗細水和調去查服之又搗查敷

患處累効

治天蛇頭用

野落蘇

即兼絲子

金銀花藤

天蕎麥

細切碎好米醋濃煎先熏後洗

又方用人糞雜黃泥搗之裹在患處即愈

拔毒散 治毒瘡生於手指赤腫堅硬俗呼為發指徹

骨疼痛不可忍者

乳香

少許研

泥蜂窠

壁間採研

研為末用釀醋調塗乾則

以醋潤之痛立止

治惡指諺云天蛇頭

蜈蚣

一條火上燒

以其烟熏病指一二次即安

治蛇消腫散

治蛇咬及蛇節疔蛇腹疔蛇頭疔蛇背

疔等證

蛇頭抓

天蘇藤

木虱藥

仙人薯

土木香

紫金藤

大小青

搗藥酒溫服以查敷之

除瘡消痛散 治蛇頭子及一切蝮蛇瘡

紫金藤

又名開  
心草

搗藥酒服之以查敷患處大効

又方 金腦香葉搗酒服以查敷之

又方 蛇頭抓草又名赤田蕒又名一麻二麻有一箇

根即一麻有二箇根名二麻 砍爛用酒炒縛之

又方 紫金鍾 六月雪 二味砍爛糟炒縛之

又方 溪汝子葉 過路蜈蚣 砍爛糟炒縛之如痛

不止用雄黃末燒烟熏之不拘已成未成即尅取効

或加蜈蚣等分亦妙

又方 紫金鍾 到金鍾 野芋子 香附子 砍爛  
用糟炒縛之

又方 井邊羊覓子 砍爛糟炒縛之

又方 山布瓜根磨醋刷以赤梗蜈蚣過路蜈蚣穿山  
蜈蚣飛天蜈蚣煎水薰洗亦効

又方 獨龍鬚根 即大葉  
白槲根 砍爛糟炒敷之

地篇蓄散 治病蛇頭子

用耳環尻

又名琉璃草又名花管草又名地篇蓄

搗藥酒服又以砍爛

酒炒縛之

敷毒方

治蛇頭子一切蝮蛇瘡

地篇蓄

金腦香

紫河車

飛天蜈蚣

紫蜈

蚣

金鳳尾

金雞舌

砍爛酒炒縛之

又方

地蜈蚣葉

溪汝樹葉

砍爛冷縛之

又方

飛天蜈蚣葉

砍爛冷縛之

又方

金腦香葉

又名社茶

砍爛冷縛之



又方 雞卵一枚開竅傾出以指時數浸之

又方 軟骨草 赤麻蕒 金盞草 耳環尻

同搗爛鹽酒炒縛之

又方 山蓼葉 田蓼蕒 地篇蓄 田螺 同搗爛

鹽酒炒縛之

又方 山布瓜根 金腦香葉 同搗爛酒炒縛之

浸毒散 治前證並効

毛藤子 石楠藤 鉄菱角 穿山蜈蚣 背子蜈

蚣 赤麻蕒 金腦香 梭婆子根 飛天蜈蚣

赤梗過路蜈蚣 同煎水入些醋和煖浸洗

治蛇頭瘡 其形生時在手足上瘡傍一塊開如蛇口之狀痛而流血不止者此藥治之

右用雄黃蜈蚣全蠍各一錢研為細末看瘡濕劈開入藥擦在瘡上却以小油抹裁帛拴住如乾小油調搽

五指頭生疽名為敦疽係臟腑積熱治不可緩宜內疎

黃連湯紫金丹烏金散及一粒金丹下之

手指節發

手指節結毒焮赤腫痛又名病繭又名蛇節疔又名釘節天蛇又名病蛇節治法與天蛇頭大同小異

金雞舌散 治病繭

金雞舌根磨酒服 或磨半泔半醋煖塗之

又方 落鴉鎗根搗酒煖服以查敷患處

代指

代指者先腫焮熱痛色不黯緣爪甲邊結膿劇者爪皆脫落但得一物冷藥汁澗漬之佳爪者筋之餘筋賴血養血熱甚注於指端故指腫熱結聚成膿甚則爪甲脫落此病類於指疽然無蘊毒故色不黯黑雖久亦不殺人 內服方聖濟總錄有漏蘆湯藍花湯中用漏蘆藍花升麻大黃黃芩玄參朴硝既無蘊毒何為用硝黃下藥輕病重治能無過乎故今不取

升麻湯

用升麻甘草各半兩剉細用水二升煎至一升去滓  
下芒硝末半兩攪勻溫浸指上數十遍冷即再煖以  
差為度 一方用梔子仁甘草各一兩 一方單用  
甘草 一方單用芒硝 一方單用麻黃以上並如  
上法煎浸

千金治指痛欲脫用豬脂和鹽煮令消熱內指中一食  
久佳 千金翼和乾薑 一方用醬汁 一方醬合蜜  
煎沸稍熱傳日五七上

丹治手指忽腫痛名為代指以烏梅入醋研浸患處立瘥

治手指腫酸漿水入少鹽熱浸之冷即易

胷部

九

井疽

靈樞云發於胷名曰井疽其狀如大豆三四日起不早治下入腹不治七日死矣 或問心窩生疽何如曰此證初起如黃痘肉色不變名曰井疽又名穿心冷癰若

冷氣攻心精神恍惚嘔吐冷痰惡聞食臭毒氣內陷腹  
脹滿者不治若心躁如焚肌熱如火不時盜汗唇焦舌  
乾黃色渴飲冷水者是正候也急服活命飲加黃連桔  
梗勝金丹奪命丹汗之壯實者一粒金丹下之惡證多  
治稍遲多致顛危宜服犀角解毒丸

### 甘疽

靈樞云發於膺

膺胸兩旁高  
處亦謂之臑

名曰甘疽色青其狀如穀

實瓜瓞常苦寒熱急治之去其寒熱不急治十日死死

後出膿

臚中疽

或問心窩上兩乳間生疽何如曰此臚中發疽也蓋臚中為氣之海氣所居焉能分布陰陽若臟腑陰陽不和七情不平則發此證宜活命飲加紫蘇薄荷葉汁之奪命丹勝金丹紫金丹選用稍遲則潰爛惡證多者難治

脾發疽

或問心窩下旁生疽何如曰此名脾發疽毒由多食煎



燂醉飽入房以致毒聚脾經而作活命飲加桔梗升麻  
紫金丹勝金丹汗之壯實者八陣散下之老弱者十全  
大補湯稍遲則潰傷脾膜膿如蟹沫者死服藥而嘔飲  
食不進者死

或問一人年三十胃前肋上堅硬如石者尺許寒熱大  
作飲食不進徧身疼痛煩躁不寧胃膈填脹何如曰凡  
在胸及胸之側或是肩前下延及脇形長如蛤皆為馬  
刀瘡屬手少陽三焦經足陽明胃經手厥陰心包絡鬱

火怒氣積痰所致宜灸宜汗攻補兼施則消宜服勝金丹烏金散壯實者一粒金丹下之活命飲加柴胡過時則潰爛徹骨久而不斂者死未潰而譫語神昏泄利嘔吐者不治

一夫人性剛多怒胸前作痛肉色不變脉數惡寒經曰洪數脉應發熱反惡寒瘡疽也今脉洪數則膿已成但體豐厚故色不變似乎無膿以痛極始肯針入數寸膿數挽以清肝消毒藥治之而愈設泥其色而不用針無

可救之理 一人年踰四十胸患瘡成漏日出濃梳許  
喜飲食如常用十全大補湯加遠志貝母白欬續斷灸  
以附子餅膿漸少調護歲餘而愈 一少婦胸膈間潰  
一竅膿血與口中所唾相應而出以參芪當歸加退熱  
排膿等藥而愈或曰此因肺痿所致 一人胸腫一塊  
半載不消令灸百壯方潰服大補藥不欬灸附子餅而  
愈 一百戶胸患毒腫高焮赤發熱脉數大小便澀飲  
食如常齊氏曰腫起色赤寒熱疼痛皮膚壯熱頭目昏

重氣血實也又曰大小便澁飲食如故腸滿膨脹胸膈痞悶肢節疼痛身熱脉大精神昏塞臟腑實也進黃連內陳湯二劑諸證悉退更以荆防敗毒散加黃芩山梔四劑稍愈再以四物加苓連白芷桔梗甘草金銀花數劑而消

機按此項治法又有先後次序

雖因脉證皆實而用泄法然泄序先攻裏後發表最後又用和

解前賢治病不肯猛浪如此學者可不以此為法哉

### 乳癰乳巖

丹溪乳房陽明所經乳頭厥陰所屬乳子之母不知調

養怒忿所逆鬱悶所遏厚味所釀以致厥陰之氣不行  
故竅不通而汁不得出陽明之血沸騰故熱甚而化膿  
亦有所乳之子隔有滯痰口氣煖熱含乳而睡熱氣所  
吹遂生結核於初起時便須忍痛揉令此軟吮令汁透  
自可消散失此不治必成癰癰治法疎厥陰之滯以青  
皮清陽明之熱細研石膏行污濁之血以生甘草節消  
腫導毒以瓜蒌實或加沒藥青橘葉皂角針金銀花當  
歸頭或湯或散加減隨意消息然須以少酒佐之若加

以艾火兩三壯於腫處其効尤捷彼村工喜於自衒便  
妄用針刀引惹拙病良可哀憫若夫不得於夫不得於  
舅姑憂怒鬱遏時日積累脾氣消沮肝氣橫逆遂成隱  
核如鼈碁子不痛不痒十數年後方為瘡陷名曰妳巖  
以其瘡形嵌凹似巖穴也不可治矣若於始生之際使  
能消釋病根使心清神安然後施之治法亦有可安之  
理予族姪婦年十八歲時曾得此察其形脉稍實但性  
急躁伉儷自諧所難者後姑耳遂以單方青皮湯間以

加減四物湯行經絡之劑兩月而安 此病多因厚味  
濕熱之痰停蓄膈間與滯乳相搏而成又有滯乳因兒  
口氣吹噓而成又有拗怒氣激滯而生者煨石膏燒樺  
皮瓜蒌實甘草節青皮皆神效藥也婦人此病若早治  
之便可立消有月經時悉是輕病五六十後無月經時  
不可輕易省也 薛男子房勞恚怒傷於肝腎婦人胎

產憂鬱損於肝脾若焮痛寒熱當發散表邪腫焮痛甚  
當清肝消毒並宜隔蒜灸不作膿或膿成不潰托裏散

為主不收斂或膿清稀補脾胃為主若膿出反痛或作寒熱氣血虛也十全大補湯體倦口乾中氣虛也補中益氣湯晡熱內熱陰血虛也八珍湯加五味子欲嘔作嘔胃氣虛也香砂六君子湯食少作嘔胃氣虛寒也前湯加藿香食少泄瀉脾氣虛寒也前湯加炮黑乾薑若勞碌腫痛氣血未復也八珍湯倍用參苓歸朮若怒氣腫痛肝火傷血也八珍加柴胡山梔若肝火血虛而結核者四物湯加參朮柴胡升麻若肝脾氣血虛而結核



者四君子加芍歸柴胡升麻鬱結傷脾而結核者歸脾湯兼瓜蒌散若鬱怒傷肝脾而結核不痒不痛者名曰乳岩最難治療苟能戒七情遠厚味解鬱結養氣血亦可保全

內托升麻湯 治婦人兩乳間出黑頭瘡頂陷下作黑眼并乳癰初起者亦治

升麻 葛根 連翹 當歸身 黃檗

各三錢

黃芪

三錢

牛蒡子 甘草

炙各一錢

肉桂

五分

作一服用水一鍾酒

半鍾煎至一鍾食後服

又方 治婦人乳中結核

升麻 連翹 甘草節 青皮

各二錢

瓜蒌仁

三錢

作一服水二鍾煎至一鍾食後細細呷之

乳癰

青皮 瓜蒌 橘葉 連翹 桃仁

留尖

皂角刺

甘草節 如破多加參芪

神効瓜蒌散 治乳癰乳巖神効丹溪亦云妙捷恐貧

賤之家未能辨集者用後蒲公英草尤妙

瓜蒌

一枚去皮焙為末  
用子多者有力

生甘草

當歸

酒浸焙  
各半兩

乳香

另研  
沒藥

另研各  
二錢半

共為末用無灰酒三升於銀石器

內慢火熬取一升清汁分作三服食後良久服如有

妳巖便服此藥可杜絕病根如毒氣已成能化膿為

黃水毒未成即於大小便中通利如疾甚再合服以

退為度 立効散與此方間服神効但於瓜蒌散方

減去當歸加紫色皂角刺一兩六錢是也

究原五物湯 癰疽發背乳癰通用

括蕒

研枝

皂角刺

半燒帶生

沒藥

各半兩

乳香

甘草

各二錢半

右麤末以醇酒三升煎取二升時時飲之痛不可忍

立止

連翹飲子 治乳癰

連翹 川芎 瓜蒌 皂角針 橘葉 青皮 甘

草節

桃仁 各二錢

右作一服用水二鍾煎至一鍾

食遠服 已破者加參芪當歸未破者加柴胡升麻

清肝解鬱湯

治肝經血虛風熱或肝經鬱火傷血兩

乳內結核或為腫潰不愈凡肝胆經血氣不和之症皆

宜用此藥

人參

去蘆

茯苓

貝母

去心

山梔

炒

熟地黃

芍藥

各一錢炒

白朮

當歸

各一錢五分

柴胡

川芎

陳皮

各八分

甘草

五分牡丹皮

用水煎服

復元通氣散

治婦人發乳癰疽及一切腫毒

木香

茴香

青皮

穿山甲

炙酥

陳皮

白芷

甘

草 漏蘆 貝母

去心蘆製  
各等分

右研為細末每服三錢好酒調下

消毒散 治吹乳乳癰并便毒如增寒壯熱或頭痛者宜  
先服人參敗毒散一二服方可服此藥如無前證即服  
此藥二三劑或腫不消宜服托裏藥

青皮 去白 金銀花 天花粉 柴胡 僵蠶 炒 貝母 當

歸 酒拌 白芷 各二錢

右水煎食遠服如便毒加煨大黃一錢空心服

本草蒲公英草味甘平無毒主婦人乳癰腫水煮汁飲之及封之立消

丹蒲公英在處田間路側有之三四月開黃花似菊味甘解毒散滯意其可入陽明太陰經洗淨細研以忍冬藤濃煎湯入少酒佐之隨手便欲睡睡覺已失之矣

兵部手集方 治疔乳硬欲結膿服此即消

用鹿角於麓石上磨取白汁塗之乾又塗不得近手并以人啣却黃水一日許即散或用鹿角剉為極細

末酒調二三錢服亦效 孕婦忌服

乳癰初發方

貝母為末每服二錢溫酒調下即以兩身覆按於桌上垂乳良久自通

時康祖為廣德宰事張王甚謹後授溫倅左乳生癰繼又胸臆間結核大如拳堅如石荏苒半載百療莫效已而牽掣臂腋徹于肩痛楚特甚亟禱王祠下夢聞語曰若要安但用薑自然汁製香附服之覺呼其子檢本草



視之二物治證相符訪醫者亦云有理遂用香附去毛薑汁浸一宿為末二錢米飲調和數服瘡膿流出腫硬漸消自是獲愈 一婦人稟實性躁懷抱久鬱左乳內結一核按之微痛以連翹飲子二十餘劑少退更以八珍加青皮香附桔梗貝母二十餘劑而消

張氏橘皮湯 治乳癰未結即散已結即潰極痛不可

忍者神效因小兒吹乳變成斯疾者並皆治之

用陳皮

湯浸去白晒乾麴炒微黃為細末

麝香研酒調二錢初發覺

赤腫疼痛一服見効

丹乳癰初發腫硬一服瘥用真樺皮

末為

酒服方寸匕睡

醒已失

出靈苑方

羅勝金丹

治婦人吹乳極有神効用百齒霜

即木梳上髮垢

右一味不拘多少用無根水為丸如梧桐子大每服三

丸倒流水送下食後令病左乳者左卧右乳者右卧於

溫處汗出愈

用新汲水傾於房上接之乃倒流水也

圖經治婦人妳疼痛不可忍用穿山甲

炙黃

木通

各一兩

自

然銅

半兩生用

三味搗細末每服二錢溫酒調下無時

簡易獨聖散

治婦人吹妳

白丁香

半兩搗羅為末

每服一錢七溫酒調服無時

雲岐治婦人吹乳皂角散歌曰

婦人吹乳意如何皂角燒灰蛤粉和煖酒一盃調一

字頃間揉散咲呵呵

又方

用乳香一錢研瓜蒌根末一兩同研勻溫酒調服二錢

產後乳脹以大麥芽一兩炒研煎湯飲之自消

丹楊孺人乳腫痛

青皮 石膏

研煨

連翹

皂角刺

炒

黃藥子

當歸頭

木通

各一錢

甘草

生三分

作一貼入好酒些少同煎飲

之又有別藥洗腫處

義二孺人平時乳內有結核不為痛忽乳邊又有一腫核却頗有些痛

黃芩

川芎

木通

陳皮

各四錢

人參

二錢

大腹皮

三錢 炙甘草 生甘草 當歸頭 芍藥 各一錢

分為二貼煎服

二孺人但經將行而乳腫先兩日發口乾而不渴食少減脉左弦帶數右却平治用四物湯加陳皮白朮茯苓帶熱下與點丸三十粒 一後生作勞風寒夜熱左乳痛有核如掌脉細澀而數此陰滯於陽也詢之已得酒遂以瓜蒌子石膏乾葛台芎白芷蜂房生薑同研入酒服之四貼而安 一婦人內熱脇脹兩乳不時作痛口

內不時辛辣若卧而起急則臍下牽痛此帶脉為患用  
小柴胡加青皮黃連山梔二劑而瘥 一婦女發熱作  
渴至夜尤甚兩乳忽腫肝脉洪數乃熱入血室也用加  
味小柴胡湯熱止痛消

雲岐連翹湯 治產後妬乳并癰

連翹 升麻 芒硝 各一兩 玄參 芍藥 白欬 防

己射干

各八錢

大黃

二錢

甘草

六錢

杏仁

四十枚

去皮尖

剉為

散以水六升煮二升下大黃次芒硝分三服

一儒者兩乳患腫服連翹飲反堅硬食少內熱胸脇作痛日晡頭痛小便赤澁此足三陰虛而兼鬱怒前藥服損脾肺先用六君加芎歸柴胡山梔四十餘劑元氣復而自潰仍作痛惡寒此氣血虛也用十全大補湯六味丸而愈 封君袁陽涇左乳內結一核月餘赤腫此足三陰虛兼怒氣所致用八珍加柴梔丹皮四劑赤腫漸退肉核漸消又用清肝解鬱湯而愈時當仲秋兩目連剗肝脉微弦此肝經火盛而風動也更加龍膽草五分

并六味地黃丸而愈若用清熱敗毒化痰行氣鮮不誤者一儒者兩脇作脹兩乳作痛服流氣飲瓜蒌散半載後左脇下結一塊如核肉色不變勞則寒熱此鬱結氣傷而為患虛而未能潰也八物加柴胡遠志貝母桔梗月餘色赤作痛膿將成矣又服月餘針之出膿碗許頓然作嘔此胃氣虛而有痰也令時啗生薑服六君子湯嘔止加肉桂而瘡愈彼後出宰每傷勞怒胸乳仍痛并發寒熱用補中益氣加炒山梔愈一婦人久鬱右



乳內腫硬用八珍湯加遠志貝母柴胡青皮及隔蒜灸  
兼服神效瓜蒌散兩月餘而消 一婦人左乳內腫如  
桃不痛不赤發熱漸瘦用八珍加香附遠志青皮柴胡  
百餘劑又兼服神效瓜蒌散三十餘劑膿潰而愈 一  
婦人因怒左乳作痛發熱表散太過腫熱益甚用益氣  
養榮湯數劑熱止膿成不從用針腫脹熱渴針膿大泄  
仍以前湯月餘始愈此證若膿未成未破有薄皮剝起  
者用代針之劑其膿自出不若及時用針不致大潰若

濃血未盡輒用生肌反助其邪慎之 一婦人膿清腫  
硬面黃食少內熱晡熱自汗盜汗月經不行此肝脾氣  
血俱虛用十全大補加遠志貝母及補中益氣各三十  
餘劑外用葱熨患處諸證尋愈 一婦人膿成脹痛欲  
針之不從數日始針出敗膿三四碗許虛證蜂起幾至  
危殆用大補兩月餘而安若元氣虛弱不作膿者用益  
氣養榮湯補之膿成即針若腫痛寒熱怠惰食少或至  
夜熱甚用補中益氣兼逍遙散補之為善 一婦年二

十有五素虛弱多鬱怒時疫後脾胃愈虛飲食愈少又  
值氣忿右乳脇下紅腫應內作痛用炒麥麩熨之腫雖  
稍散內痛益甚轉側胸中如物懸墜遂與加減四物湯  
內腫如鵝卵外大如盤胸脇背心相引而痛夜熱勢甚  
時治者皆以攻毒為言薛云此病後脾弱而復怒傷肝  
治法惟主於健脾氣平肝火則腫自消而病自愈矣定  
方以八物加陳皮黃芩柴胡山梔白芷服八劑病減六  
七去白芷加青皮木香桔梗又六劑而全愈若用攻毒

之劑病胡能瘳

葛稚川方 治婦人乳癰

人牙齒燒存性研為極細末以酥調塗貼癰上

敷乳方

天南星 生半夏 皂角針

燒帶性各三分

白芷 草烏

殭蠶

焙各一分

研細末多用葱白研取汁入蜜調敷

若破瘡口作膏藥貼

乳巖丹溪云一婦人年六十厚味鬱氣而形實多妬夏

無汗而性急急左乳結一小核大如棋子不痛自覺神  
思不佳不知食味絕半月以人參湯調青皮甘草末入  
生薑汁細細呷一日夜五六次至五七日消矣此乃乳  
巖之始不早治隱至五年十年已後發不痛不痒必於  
乳下潰一竅如岩穴出膿又或五七年十年雖飲食如  
故洞見五內乃死惟不得於夫者有之婦以夫為天失  
於所天乃能生此謂之巖者以其如穴之嵌岬空洞而  
外無所見故名巖患此者必經久淹延惟此婦治之早

正消患於未形餘者皆死凡十餘人又治一初嫁之婦只以青皮甘草與之安隆慶庚午予自秋闈歸則亡妹已病蓋自七月乳腫痛不散八月用火鍼取膿醫以十全大補湯與之外敷鉄箍散不効反加喘悶九月產一女潰勢益大而乳房爛盡延及胃脘膿水稠粘出膿幾六七升略無飲勢十一月始歸就醫改用解毒和平中劑外搽生肌散龍骨寒水石等劑膿出不止流澣所及即腫泡潰膿兩旁紫黑瘡口十數胸前腋下皆腫潰

不可動側其勢可畏余謂產後毒氣乘虛而熾宜多服  
黃芪解毒補血益氣生肌而醫不敢用十二月中旬後  
益甚瘡口廿餘諸藥盡試不効始改用于藥時膿穢粘  
滯煎楮葉豬蹄湯沃之頓爽乃治一方名黃芪托裏湯  
黃芪之甘溫以排膿益氣生肌為君甘草補胃氣解毒  
當歸身和血生血為臣升麻葛根漏蘆為足陽明本經  
藥及連翹防風皆散結踈經瓜蒌仁黍粘子解毒去腫  
皂角刺引至潰處白芷入陽明敗膿長肌又用川芎三

分及肉桂炒藥為引用每劑入酒一盞煎送白玉霜丸  
疎膿解毒時膿水稠粘方盛未已不可遽用收澁之藥  
理宜追之以翠青錠子外摻明日膿水頓稀痛定穢解  
始有向安之勢至辛未新正患處皆生新肉有紫腫處  
俱用葱熨法隨手消散但近腋足少陽分尚未斂乃加  
柴胡一錢青皮三分及倍川芎膿水將淨者即用搜膿  
散摻之元宵後遂全安 萬曆癸卯二月時侍御趙蓋  
菴提學南畿托敝縣令致意約會于茅山予以館誼不



容辭特往赴之則有病欲求治也袒其胸左乳側瘡口  
大如椀惡肉紫黯嶙峋嵌深宛如巖穴之狀臭不可近  
予問何從得此曰館試屢下意不能無鬱夏月好以手  
捋乳頭遂時時有汁出或曰是真液也不可泄因覆之  
以膏藥汁止而乳旁有核既南來校閱勞神乳核輒腫  
痛一書吏頗知醫謂汁欲出而為膏藥所沮又不得歸  
經故滯為核聞婦人血上為乳汁今汁亦血類也宜飲  
芎歸酒行其滯血核自消矣吾以為然而飲之核如故

而吐血衄血大作飲京口張醫藥吐血止而腸風作張  
矜自功謂血從下出者順然體則重困矣復飲他醫藥  
便血亦止乳核之勢日益張遂至於潰一草澤醫能煉  
砒治痔漏私計此亦漏瘡也納藥其中痛欲死潰不可  
支故至此予意在法為不治而見其精神尚旺飲噉自  
如無甚惡候尚可延引歲月為之定方而別後校士廣  
陵不相聞問遂改用它醫藥至八月初以滯下發噦死  
夫男子患乳巖者少矣其起又甚微眇而三為盲醫所

誤遂至此砒誠不可納也芎歸何罪乎不可不書之以為後鑒

蒲公英草搗爛盒患處神妙 天南星末以溫酒調塗之 治婦人乳痛成癰以益母草為末水調塗乳上一宿自瘥生搗爛傳之亦得

婦人吹乳用桑樹

飯搗成膏貼之 乳頭裂破丁香末傳之

乳癰 乳中穴

在乳下中針入 分沿皮向後一寸半灸瀉

甲乳癰寒熱

短氣卧不安膺窓主之

乳癰淒素寒熱痛不可按乳

根主之

大驚乳痛梁邱主之

乳癰有熱三里主之

乳癰諸藥不能止痛者

三里針入五分立止

女子乳癰驚巨虛下廉主之

千金云臂腫重

足踏不收跟痛

乳癰太衝及復溜主之

妬乳太淵

主之

婦人乳餘疾盲門主之

證治準繩卷一百九

# 欽定四庫全書

子部

證治準繩卷一百十

詳校官太醫院醫士

臣舒岱

編修臣倉聖脈覆勘

總校官進士

臣

朱

鈐

校對官典簿

臣

郭祚燾

膳錄監生

臣

饒文洲

欽定四庫全書

證治準繩卷一百十

明 王肯堂 撰

外科

脇部

脇疽

靈樞云發於脇名曰敗疵敗疵者女子之病也灸之其狀大癰膿其中乃有生肉大如赤小豆治之剉蔞薹草

根各一升以水一斗六升煮之竭為水三升即強飲厚

衣坐於釜上令汗至足已

疵疾黃切 甲乙經於赤小豆下作治之判腹草赤松根

各一升 鬼遺云俠熒疽腫起發肋及兩肩肘頭二十日不

穴死九日可刺發赤白相間膿多可治全無赤白者不

治 又云兩肋起疽名為發肋初腫盛至十數日不穴

攻即腫大如杯椀高如鋤背痛徹內腸絞刺左邊患應

右邊痛右邊患應左邊痛唯有此處多是內毒却入攻

而死者多人有斯患急以針刺出膿血則免內攻傷內

矣 或問脇上生疽何如曰是名脇疽屬手厥陰心包絡足厥陰肝火熱毒怒氣相併而作活命飲加柴胡紫金丹烏金散選用壯實者八陣散一粒金丹下之此證宜速治不然潰爛不斂多致危困一人患此如胡桃微痛微腫月餘漸大如杯醫作痰治或作肝積或云痞塊竟莫能効數月遂大如盎堅硬如石不甚疼痛微紅漫腫復得暴怒胸腹脹滿小水不利脈遲而微投以化氣丸六一散小便利胸次寬繼投烏金散奪命丹間服八



陣散月餘漸消

一人年踰五十腋下患毒瘡口不合右關脈數而渴此胃火也用竹葉黃耆湯而止再用補氣藥而愈嘗治午後發渴或發熱用地骨皮散効 一人性急味厚常服燥熱之藥左脇一點痛輕診弦重乳知其痛處有膿與四物加桔梗香附生薑煎十餘貼痛處微腫如指大針之少時屈身膿出與四物調理而安 一夫人左脇內作痛牽引胸前此肝氣不和尚未成瘡用小柴胡加青

皮枳殼四劑少可加芎歸治之愈一人連年病瘥後生子三月病熱右脇下陽明少陽之分生一癰甫平左脇下相對又一癰膿血淋漓幾死醫以四物湯敗毒散數倍人參以香附為佐犀角為使大料飲乳母兩月而愈踰三月忽腹脹生赤癰如霞片取剪刀草汁調原蠶沙傳隨消又半月移脹入囊為腫黃瑩裂開兩九顯露水出以紫蘇葉盛麩炭末托之旬餘而合此胎毒證也一婦因忿鬱腋下結一核二十餘年因怒加腫痛完穀

不化飲食少思此腸胃虛也以六君子加砂仁肉桂乾

薑肉豆蔻泄雖止而膿清瘡口不合用十全大補湯月

餘而愈

機按前項二條腸瘡一因其性多躁急故用四物湯陰柔之劑以安靜之一因其肝氣不平故

用小柴胡疎理之劑以和解之此又因其性情為治不時專於攻毒也

張通北人年踰

四十夏月腋下患毒潰後不斂膿出清稀皮寒脈弱腸

鳴切痛大便溏泄食下即嘔此寒變而內陷也宜大辛

溫之劑遂以托裏溫中湯二貼諸證悉退更以六君子

加炮乾薑肉桂數劑再以十全大補湯而愈 一人脇

腫一塊日久不潰按之微痛脈微而瀉此形證俱虛也  
經曰形氣不足病氣不足當補不當瀉宜用人參養榮  
湯彼不信乃服流氣飲虛證悉至方服前湯月餘少愈  
但腫尚硬以艾葉炒熱熨患處至十餘日膿成以火針  
刺之更灸豆豉餅又服十全大補湯百貼而愈 蓋流  
氣飲通行十二經諸經皆為所損沉膽經之血本少又  
從而損之寧不傷生東垣曰凡一經受病止當求責其  
一經不可干擾餘經苟泛投剋伐之劑則諸經被戕寧

無危乎 一人年三十素饑寒患右肋腫如覆瓢轉側作水聲脈數經曰陰虛陽氣湊襲寒化為熱熱甚則肉腐為膿即此證也及按其腫處即起是膿成遂濃煎黃芪六一湯令先飲二鍾然後針之膿出數挽虛證並至遂用大補三月餘而愈 大抵膿血大泄血氣俱虛當峻補之雖有他病皆宜緩治蓋元氣一復諸病自退老弱之人不問腫潰尤當補也 一人因勞發熱脇下腫痛脈雖大按之無力此氣血虛腠理不密邪氣襲於肉

理而然也當補之以接虛怯之氣以補中益氣湯加羌活四劑少可去羌活又百餘劑而愈 一人面白神勞脇下生一紅腫如桃教用補劑不信乃用流氣飲十宣散血氣俱憊而死 一人年踰二十腋下患毒十餘日腫硬不潰脈弱時嘔予謂腫硬不潰陽氣虛嘔吐少食胃氣弱宜六君子湯加砂仁藿香彼謂腫瘍時嘔毒氣攻心潰瘍時嘔陰虛宜補予曰此丹溪大槩言也若腫赤痛甚煩躁脈實而嘔為有餘當作毒氣攻心而下之

以瘡屬心火故也腫硬不潰脈弱時嘔為不足當補之  
亦有痛傷胃氣或感寒邪穢氣而嘔者雖腫瘍尤當助  
胃壯氣益腫瘍毒氣內侵作嘔十有一二潰瘍濕氣內  
傷作嘔十有八九彼不信飲攻伐藥愈甚復請診脈微  
弱而發熱予謂熱而脈靜及脫血脈實汗後脈躁皆難  
治果歿

內發丹毒

或問脇下至腰胯間腫痛赤色如霞何如曰此名內發

丹毒治之稍緩毒攻於內嘔噦昏迷胸腹膜脹者死二  
便不通遍身青紫者死急砭出惡血服防風通聖散去  
白朮甘草紫金丹勝金丹汗之服汗劑得汗則生無汗  
則死嘔吐不食譫語者死

腹部

臍上疽

或問臍上寸許發疽何如曰此名衝疽又名中發疽一  
名墜腎瘡由心火熾盛流入腎經所致腫高膿稠色赤



可治宜流氣飲活命飲勝金丹奪命丹選用若平塌黑色膨脹惡心膿水清稀內腎疼痛渴甚瀉利無度譫語直視者死潰久不斂者死按後所言危證只是虛耳如能大補不死也

臍癰

或問當臍生癰何如曰此即臍癰也由心經積熱流於大小腸二經所致宜何首烏散活命飲加升麻及紫金丹三生散選用壯實者一粒金丹下之按臍為神闕

穴禁針之所早消散之免使見膿為上

小腹疽

鬼遺云衝疽發小腹疼痛而振寒熱四日惛惛五日變色可刺不刺及導引出膿毒不治五十餘日死或問臍下發疽何如曰此即小腹癰臍下一寸五分為氣海二寸為丹田三寸為關元皆屬任脈由七情不和所致急服活命飲紫金丹奪命丹壯實者一粒金丹八陣散下之老弱者黃芪木香散內補十宣散十全大補湯選

用若潰而低陷膿水清稀或潰爛久不斂者死 或問  
一人年十九患疽於小腹之左數月堅硬如石寒熱間  
作飲食減少漸至羸廋何如曰是名緩疽屬足太陰經  
積熱所致由醫不得法邪正相持耳投以紫金丹活命  
飲間服十全大補湯半月而愈

總論

薛腹癰謂瘡生於肚腹或生於皮裏膜外屬膏梁厚味  
七情鬱火若漫腫堅硬肉色不變或脈遲緊未成膿也

四君加芩歸白芷枳殼或托裏散腫軟色赤或脈洪數  
已成膿也托裏消毒散膿成而不外潰者氣血虛也卧  
針而刺之腫焮作痛者邪氣實也先用仙方活命飲隔  
蒜灸以殺其毒後用托裏以補其氣若初起欲其內消  
當助胃壯氣使根本堅固而以行經活血之藥佐之若  
用尅伐之藥欲其消散則腫者不能潰潰者不能斂若  
用疎利之藥下其膿則少壯者多為難治老弱者立見  
危亡

一人年踰三十腹患癰腫脈數喜冷齊氏曰瘡瘍腫起  
堅硬者實也河間曰腫硬替悶煩躁飲冷邪在內也用  
清涼飲倍大黃三劑稍緩次以四物湯加苓連山梔木  
通四劑而潰更以十宣散去參耆桂加金銀花天花粉  
彼欲速効自服溫補藥肚腹遂腫小便不利仍用清涼  
飲膿潰數椀再以托裏藥治之而愈 一人腹癰焮痛  
煩躁作嘔脈實河間曰瘡瘍火屬須分內外以治其本  
又云嘔噦心煩腫硬替悶或皮肉不變脈沈而實毒在

內也當踈其內以絕其源用內踈黃連湯利二三行諸證悉退更以連翹消毒散而愈 一人腹癰膿熱開遲脈微細膿出後瘡口微膿如蟹吐沫此內潰透膜也瘡瘍透膜十無一生雖用大補亦不能救此可為待膿自出之戒也 一人素嗜酒色小腹患毒脈弱微痛欲求內消予謂當助胃壯氣兼行經活血佐之可消彼欲速効自用敗毒等藥勢果盛瘡不潰膿飲食少思兩月餘復請診脈愈弱盜汗不止聚腫不潰肌寒肉冷自汗色

脫此氣血俱虛故不能發腫成膿以十全大補湯三十  
餘劑膿成針之反加煩躁脈大此亡陽也以聖愈湯二  
劑仍以煎湯百劑而愈 司馬李梧山患此腹痛而勢  
已成用活命飲一劑痛頓止用托裏消毒散腫頓起此  
膿將成也用托裏散補之自潰而愈 錦衣掌堂劉廷  
器正德辛未仲夏腹患癰潰而膿清熱渴腹脹作嘔不  
食或以為熱毒內攻皆用芩蓮大黃之劑病愈甚薛曰  
當捨時從證投以參芪薑附等藥一劑嘔止食進再用

托裏等劑而瘡愈 進士邊雲莊腹痛惡寒脈浮數薛  
曰浮數之脈而反惡寒瘡疽之證也不信數日後復請  
視之左尺洪數薛曰內有膿矣仍不信至小腹痛脹連  
及兩臂始悟薛曰膿潰臂矣氣血俱虛何以收斂急服  
活命飲一鍾臂潰一孔出膿斗許氣息奄奄用大補藥  
一劑神思方醒每去後糞從瘡出痛不可當小腹間如  
有物上挺即發痙不省人事煩躁脈大舉按皆實省而  
診之脈洪大按之如無以十全大補倍用參芪至四斤



更加附子二枚煎膏服而瘕止又用十全大補湯五十  
餘劑而瘡愈 上舍周一元腹患癰三月不愈膿水清  
稀朝寒暮熱服四物黃檗知母之類食少作瀉痰涎上  
湧服二陳枳實之類痰涎愈甚胸膈痞悶謂薛曰何也  
薛曰朝寒暮熱血氣虛也食少作瀉脾腎虛也痰湧胸  
痞脾肺虛也悉因真氣虛而邪氣實也當先壯其胃氣  
使諸臟有所稟而邪自退矣遂用六君加黃芪當歸數  
劑諸證漸退又用十全大補湯肌肉漸斂更用補中益

氣湯調理而痊 上舍毛體仁素陰虛春初咳嗽胸中  
隱痛腎脈數而無力肺脈數而時見此腎氣虧損陰火  
熾盛用六味丸料一劑服之病勢雖減內癰已成蓋因  
元氣虛而未能發出火令可畏不信服痰火之劑兩月  
後乳間微腫脈洪數而無力薛曰膿內潰矣當刺出其  
膿以免內攻之禍不信又月餘請視但針得一孔膿攪  
不利仍服內攻唇舌青赤薛曰臟腑已壞吾何能治之  
後果歿 從姪孫年十四而畢姻乙巳春年二十四腹

中作痛用大黃等藥二劑下血甚多胸腹脹滿痰喘發熱又服破氣降火藥一劑汗出如水手足如冰薛往視適歸診之左關洪數右尺尤甚乃腹癰也雖能收斂至夏必變而成瘰症用參芪各一兩歸朮各五錢陳皮茯苓各三錢炙草炮薑各一錢二劑諸證少退腹始微赤按之覺痛又二劑作痛又二劑腫痛脈滑數針出膿瘰更用大補湯精神飲食如故因遺精患處色黯用前藥加五味山茱山藥骨脂吳茱等劑瘡口漸斂瘰證悉具

其脈非洪大而數即微細如無唯專服獨參湯人乳汁少復良久仍脫余曰當備後事以俟火旺乃禱鬼神巫者歷言往事如見更示以方藥皆峻利之劑且言保其必生敬信服之後果歿經曰拘於鬼神者不可以言至德而況又輕信方藥於邪妄之人耶書此警後

背部

發背

或問背發疽有幾曰上中下三發俱在脊中屬督脈上

發者傷於肺發於天柱骨下中發者傷於肝為對心發  
下發者傷於腎為對臍發皆由積熱怒氣所致初如粟  
米或麻或痒或拘急或不痛或大痛初覺便宜隔蒜灸  
之或汗或下或托量其虛實施治腦發背發在上者不  
可用木通恐導虛下元故也老弱者尤宜戒然三發背  
總要之地與他處不同尤所當謹微有痛痒宜速治之  
活命飲加羌活紫金丹勝金丹奪命丹選用壯實者一  
粒金丹八陣散等下之老弱者黃芪木香散十全大補

湯托之

鬼遺云蜂疽發髀皆起心俞及心包絡俞若肩髃二十  
日不穴死十日可刺其色赤黑膿清者可治 或問一  
人年六十背患疽狀如蜂房十日而平塌寒熱痛楚殊  
甚飲食少進膨脹淋瀝何如曰此蜂窠發也診其脈微  
而遲四肢厥冷為不足詢其先前過服耗氣之劑又得  
暴怒用活命飲加參芪歸朮兼以烏藥青皮木香間與  
紫金丹服之起發膿潰服十全大補湯而愈

特疽發肺俞及肝俞不穴二十日死八日可刺其色紅赤內隱起如椒子者死

陰陽二氣疽廣闊滿背或大或小不常腫熱脹大十日可刺導引出膿不拘深淺多少發渴體倦十日外不見膿不治 或問背上麻木不常時腫時塌忽軟忽硬乍寒乍熱何如曰此名陰陽疽由七情內乖陰陽不和也此證必大渴神清脈定者可治宜活命飲加羌活或勝金丹奪命丹選用昏迷躁亂飲食不進者死十日得黃

白膿者可治數日無膿者死

筋疽發夾脊兩邊大筋上其色蒼八日可刺有癰在肥腸中九十日死

禽疽始發者如疹數十處如拳打之狀發寒齒噤如此者十四日死十日可刺導引膿出即愈 或問背忽麻木拘急不痛十數處肉紫色如拳觸狀何如曰此名禽疽七日内寒熱口噤者死急服活命飲加羌活獨活勝金丹奪命丹得汗可治無汗不治神清脈和可治神昏



脈躁或微或代者死漫腫不潰宜服臺閣紫微丸

或問背疽兩頭小四邊散何如曰此名兩頭發又名滿天星一名廣綿背發因積怒蓄熱所致活命飲加羌活紫金丹勝金丹壯實者八陣散一粒金丹下之腫高紅潤者生低陷黑暗者死

或問背脇之間三兩處發疽何如曰此名老鼠攢一名遊走血脾癰由怒氣積熱所致多發於足少陽足厥陰二經宜順氣清熱之劑服黃連解毒湯活命飲加黃連

梔子及服紫金丹壯實者一粒金丹下之老弱者黃芪  
木香散內補十宣散選用七日不見膿黑陷及躁亂者  
死

或問背上生疽肉色不變麻木微痒頑如牛領之皮二  
三尺許何如曰此名竟體發亦名椒眼發由盛暑時空  
腹感觸穢氣及憤怒積鬱所致宜活命飲加羌活或黃  
蓮解毒湯勝金丹烏金散選用壯實者八陣散一粒金  
丹下之七日內未成膿宜隔蒜灸灸而起發神清脈和

者可治灸而不起腹脹神昏脈微或促或代者死服汗劑得汗者生無汗者死服補劑紅潤起發知痛者生膨脹不食乾枯黑陷者死

或問背當心而痛麻木不常累累如彈如拳堅硬如石痛徹五內遍身拘急何如曰此名酒毒發疽由饑飽勞傷炙燂厚味所致宜服黃連解毒湯加羌活乾葛或神効消毒散內疎黃連湯紫金錠勝金丹選用神昏脈亂大渴狂言有妨飲食者死二便閉結者死有因寒變而

內陷者用托裏溫中湯

或問背上細癰無數浸淫一二尺如湯火傷煩躁多渴何如曰此丹毒發疽也因服丹石剛劑所致紅潤者生紫枯者死惡證少者宜服黃連消毒散勝金丹國老膏惡證多神昏脈躁膨脹嘔噦者死

或問背側生疽高二寸長尺許狀如黃瓜肉色不變何如曰此名黃瓜癰一名肉龜疼痛引心四肢麻木是也此證多不可治急服紫金丹勝金丹活命飲加羌活柴

胡及奪命丹神仙追毒丸選用脈微自汗譫語者死平  
塌黑色者獨薑散主之服臺閣紫微丸

或問第九椎兩旁忽腫痛而無頭寒熱大作何如曰此  
名龍疽即中搭也屬太陽經由七情不和憤怒積熱所  
致壯實者急服一粒金丹或八陣散下之活命飲加柴  
胡羌活黃芩水酒各半煎服老弱者黃芪木香散內補  
十宣散十全大補湯選用色赤起發潤澤者可治色黑  
低陷惡心眩運大便滑泄小便如淋譫語者死

鬼遺方云人生最可憂者發背也其種有五 一曰陽毒因風熱而有或患熱毒消渴或先患傷寒餘有陽毒觸處畜積起於背脊鬻之間不問推數但從兩夾脊起止腰上滿背焮熱如炊之狀赤紫或紅如焰膿毒難成成後不止止後痛不除驚忽數日之間復平如舊將謂腫消此是內攻肉陷不可療矣 二曰陰毒發背是氣冷而作初如黍米粒起情緒不快惜惜而痛直應前心心忪怔頭目昏重寒熱如瘧五七日後如發引攻腫開

關難收內積有膿深沈遲緩未透宜急以補氣湯藥內  
托外以抽膿藥貼之宜急見膿無膿即平愈末期 三  
曰有人多服金石燒煉之藥毒惡流滯成發背者初起  
如丹疹之狀熱熱漸開如湯火瘡面色如朱心膈煩躁  
多渴嗜冷其瘡難起起即驚人猶勝於陰陽二毒者緣  
此有解金石藥毒湯散治其內也賴有根底分明亦須  
急療方安 四曰人有患酒食毒發背者此疾非近得  
之乃臟腑久積乘饑乘困食之便睡或多食酒肉冷熱

粘滑肥鮮熾膩未下胸膈房室不禁恣意當風取快脾  
臟氣虛不能受乘發毒攻背兩夾脊不問椎數初起癰  
頭如小彈子後大如拳堅如石痛遍四肢加之拘急口苦  
舌乾腹急大小便澁十數日後頭面手足虛腫及臟腑  
通泄如利內急痛者是其證也喜方腫引急用收腫發  
穴潰膿湯藥內實外泄膿水不可放縱遲緩則皮肉腐  
壞傷骨爛筋漸成膿多因而感邪內敗者死矣 五曰  
人有胃山嵐瘴氣發背毒氣先在臟腑年月浸遠氣血



虛損衰弱初起膿色青黑如靴皮頑痺痛深附筋骨徹髓按之如木石引手如深方覺似有痛處至五七日毒氣浮淺腫高色變青白有如拳打之狀寒戰似瘧及有風候頭動口偏手足厥逆眼黑睛小白多而慢此內有邪氣相搏急破出清血三五升方有黃膿白汁相和發泄其皮不寬不慢亦急脹痛亦不住直至色退熱疼方瘡亦宜急急追趕膿與毒氣外出無害

初患腫三日內灸者生 八日內膿成針烙導引者生

未瘥慎勞力者生 慎忌食者生 慎喜怒者生 體  
腫猛療者生 急療者生 不諱發背者生 待膿自  
出不導引者死 未內攻而針烙用藥導引者生 內  
攻後導引針烙者死 腫焮熱痛方盛已前療者生  
如過此後已內攻者死 膿成後出不導引但傳藥  
者死 如赤白痢氣急者是已內攻醫療無益必死  
癰不救十得五生疽不療十全死 輕腫怕痛者必死  
不遇良方者死 節候不依法者必死 愚執恣意用

性逸情者死

有發疽癰有發背疽如毒氣勇猛而發如火燒茅易於敗壞初發即可如黍米粒大三兩日漸赤引腫如手掌面大五七日如碗面大即易為攻焮熱赤引如火燒之狀浮面漸潰爛開內發腫如炊之狀外爛皮肉如削去紫瘀膿汁多而腫不退疼亦不止發渴發逆飲食不下嘔吐氣急浮淺開闔者尤宜發膿托毒湯藥用之必愈

陽證實也

其間有只如錢面大者此非不大緣為毒氣深

沉內虛毒氣近膜也此必內攻近入臟腑却外入四肢  
先攻頭面虛浮後攻手面次攻兩足面腫名曰毒氣散  
入四肢其人聲嘶氣脫眼睛黑小十指腫黑乾焦不治

陰證  
虛也

精要云凡癰疽初發腫硬高者而毒氣却淺此乃六腑  
不和為癰其證屬陽勢雖急而易治若初發如粟粒甚  
則如豆許與肉俱平或作赤色時覺痒痛痒時慎勿抓  
破此乃五臟不調為疽其證屬陰蓋毒氣內蓄已深勢

雖緩而難治

始發一粒如麻豆大身體便發熱生疽處腫大熱痛此  
為發於外雖大如盆治之百可百活

陽證實也

或身體不

熱自覺倦怠生疽處亦不熱數日後漸大不腫不痛低  
陷而壞爛此為發於內雖仙亦無如之何

陰證虛也

薛發背屬膀胱督脈經或陰虛火盛或醇酒厚味或鬱  
怒房勞所致若腫赤痛甚脈洪數而有力熱毒之證也  
為易治漫腫微痛色黯作渴脈洪數而無力陰虛之證

也為難治不腫不痛或漫腫色黯脈微細陽氣虛甚也  
尤為難治 若腫焮作痛寒熱作渴飲食如常此形氣  
病氣俱有餘也先用仙方活命飲後用托裏消毒散解

之

薛又云頭痛拘急乃表症先服人參敗毒散一二劑如焮痛用金銀花散或槐花酒神効托裏散

焮痛腫硬脈實以清涼飲仙方活命飲苦參丸 腫硬木悶疼痛發熱煩躁飲冷便秘脈沈實者內疎黃連湯或清涼飲大便已利欲得作膿用仙方 活命飲托裏散蠟蟬丸外用神異膏 漫腫微痛或

色不赤飲食少思此形氣病氣俱不足也用托裏散調  
補之 不作膿或膿成不潰陽氣虛也托裏散倍加肉

桂參芪 膿出而反痛或膿清稀氣血俱虛也八珍湯  
惡寒形寒或不收斂陽氣虛也十全大補湯 晡熱內  
熱或不收斂陰血虛也四物加參朮 作嘔欲嘔或不  
收斂胃氣虛也六君加炮薑 食少體倦或不收斂脾  
氣虛也補中益氣加茯苓半夏 肉赤而不斂血熱也  
四物加山梔連翹 肉白而不斂脾虛也四君加酒炒  
芍藥木香 小便頻數者腎陰虧損也加減八味丸  
若初患未發出而寒熱疼痛作渴飲冷此邪氣內蘊也

仙方活命飲口乾飲熱漫腫微痛此元氣內虛也托裏  
消毒散飲食少思肢體倦怠脾胃虛弱也六君子湯如  
未應加薑桂其有死者乃邪氣盛真氣虛而不能發出  
也在於旬餘之間見之 若已發出用托裏消毒散不  
腐潰用托裏散如不應急溫補脾胃其有死者乃真氣  
虛而不能腐潰也在於二旬之間見之 若已腐潰用  
托裏散以生肌如不應急溫補脾胃其有死者乃脾氣  
虛而不能收斂也在於月餘間見之



外治法初起焮痛或不痛及麻木者邪氣盛也隔蒜灸之痛者灸至不痛不痛者灸至痛毒隨火而散再不痛者須明灸之

謂不隔蒜

但未潰以前皆可灸也更用繩藥圍

之若用烏金膏或援生膏點患處數點尤好問用雄黃解毒散洗患處每日用烏金膏塗瘡口處候有瘡口即

用紙作撚蘸烏金膏絛入瘡內

翠青銳子尤妙

若有膿為脂膜

間隔不出而作脹痛者宜用針引之腐肉堵塞者去之若瘀肉腐動用踏蹄湯洗如膿稠或痛飲食如常瘀肉

自腐用消毒與托裏藥相兼服之仍用前二膏塗貼若腐肉已離好肉宜速去之如膿不稠不稀微有疼痛飲食不甘瘀肉腐遲更用桑柴灸之多用托裏藥若瘀肉不腐或膿清稀不焮痛者急服大補之劑亦用桑柴灸之以補接陽氣解散鬱毒嘗觀疽稍重未成膿者不用蒜灸之法及膿熟不開或待腐肉自去多致不救大抵氣血壯實或毒少輕者可假藥力或自腐潰怯弱之人熱毒中隔內外不通不行針灸藥無全功矣然此證若

膿已成宜急開之否則重者潰通臟腑腐爛筋骨輕者  
延潰良肉難於收功因而不斂者多矣 大抵發背之  
患其名雖多惟陰陽二證為要若發一頭或二頭其形  
焮赤腫高頭起疼痛發熱為癰屬陽易治若初起一頭  
如黍不腫不赤悶痛煩躁大渴便秘寐語斷齒四五日  
間其頭無數其瘡口各含一粟形似蓮蓬名蓮蓬發積  
日不潰按之流血至八九日或數口其頭成片所含之  
物俱出通結一衣揭去又結其口共爛為一瘡其膿內

攻色紫黯為疽屬陰難治脈洪滑者尚可沉細尤難如  
此惡證惟隔蒜灸及塗烏金膏有效 凡人背脊并  
髀皮裏有筋一層患此證者外皮雖破難潰以致內膿  
不出令人脹痛苦楚氣血轉虛變證百出若待自潰多  
致不救必須開之兼以托裏之劑常治此證以利刀剪  
之尚不能去以此堅物待其自潰豈不反傷乎非氣血  
壯實者未見其能自潰也

羅謙甫治一人年踰六旬冬至後數日疽發背五七日

腫勢約七寸許痛甚瘍醫曰膿已成可開發矣病者恐不從三日醫曰不開恐生變症遂以燔針開之膿泄痛減以開遲之故迨二日變症果生覺重如負石熱如熯火痛楚倍常六脈沈數按之有力此膏粱積熱之變也邪氣酷熱固宜以寒藥治之時月嚴寒復有時寒遠寒之戒乃思內經云有假者反之雖違其時從證可也急作清涼飲子加黃連秤一兩五錢作一服服之利下兩行痛減七分翌日復進前藥其證悉除月餘平復 虞

奕侍郎背中發小瘡不悟只以藥調補數日不疼不痒  
又不滋蔓疑之呼外醫灸二百壯已無及此公平生不  
服藥一年來惟覺時時手脚心熱疾作不早治又誤服  
補藥何可久也蓋發背無補法諺云背無好瘡但發於  
於中正者為真發背

按謂發背無補法此非通論然一種癰補而無通變者又不可不知

揚州名醫楊吉老其術甚著有一士人狀若有疾厭厭  
不聊莫能名其為何疾往謁之楊曰君熱證已極氣血  
銷鑠且盡自此三年當以疽死不可為也士人不樂而

退聞茅山觀中一道士醫術通神但不肯以技自名未必為人致力士人心計交切乃衣僮僕之衣詣山拜之願執役左右道士喜留寘弟子中誨以誦經日夕祇事願指如意經兩月餘覺其與常隸別呼扣其所從來士人始再拜謝過以實告之道士笑曰世豈有醫不得之病當為子脈之又笑曰汝便可下山吾亦無藥與汝但日買好梨啖一顆如生梨已盡則取乾者泡湯飲之仍食其滓此疾自當平矣士人歸謹如其戒經一歲復往

揚州楊醫見之訝其顏貌腴澤脈息和平謂之曰君必  
遇異人不然何以至此士人以告楊立具衣冠焚香望  
茅山設拜蓋自咎其術之未至也

程明佐治槐充胡姬年六十疽發背大如盂頭如蜂窠  
嘔逆咽不下瘍醫藥之毒雖殺而胃寒泄程曰病必分  
陰陽虛實胃傷於寒令人嘔逆溫補則榮衛充而氣血  
周貫則毒隨膿出而肌肉漸生依方投藥四五劑咽遂  
下嘔止已癰潰體漸平 陳斗崑治王主政福建人背



患一癰痛甚發咳逆十餘日水穀不下脈伏如絕醫皆不治陳視之曰此寒涼過甚中氣下陷以四君加薑桂三進而病如失癰亦漸愈 一男子年五十餘形實色黑背生紅腫及髀骨下痛其脈浮數而洪紫食亦嘔正冬月與麻黃桂枝湯加酒黃檗生附瓜蒌子甘草節羌活青皮人參黃芩半夏生薑六貼而消此亦內托之意也 周評事觀患背癰瘡口久不合召瘍醫徐廷禮療治恒以托裏十宣二散與服不効徐謂周曰更請盛用

美來共事料理吾技窮矣既而盛至按脈用藥率與徐  
類但多加人參五錢附子稍行功耳服後兩足俱暖自  
下而上謂其子曰今之藥何神哉頓覺神爽快服之旬  
日而宿口平復 御醫王介之之內年四十背疽不起  
泄瀉作嘔食少厥逆脈息如無屬陽氣虛寒用大補劑  
加附子薑桂而不應再加附子二劑瀉愈甚更以大附  
子一枚薑桂各三錢參芪歸朮各五錢作一劑腹內始  
熱嘔瀉乃止手足漸溫脈息遂復更用大補而潰托裏

而斂十年後終患脾胃虛寒而歿

丹溪治一人背癰徑尺穴深而黑急作參芪歸朮膏飲之三日略以艾炷湯洗之氣息奄奄然可飲食每日作多肉餛飩大碗與之盡藥膏五斤餛飩三十碗瘡漸合肉與餛飩補氣之有益者也 一老人背發疽徑尺已與五香十宣散數十貼嘔逆不睡素有淋病急以參芪歸朮膏以牛膝湯入竹瀝飲之淋止思食盡藥四斤膿自湧出而愈 一人發背癰疽得內托十宣多矣見膿

嘔逆發熱又用嘉禾散加丁香時天熱脈洪數有力此  
潰瘍尤所忌然形氣實只與參膏竹瀝飲之盡藥十五  
六斤竹百餘竿而愈後不戒口味夏月醉坐水池中經  
年餘左脇旁生軟塊二年後成疽自見脈證嘔逆如前  
仍服參膏等而安 汪石山治一老人患背癰診視之  
其脈洪緩而濡癰腫如碗皮肉不變按之不甚痛微發  
寒熱乃語之曰若在臍脾經絡交錯皮薄骨高之處則  
難矣今腫去脾骨下掌許乃太陽經分尚可治遂用黃

芪五錢當歸羌活甘草節各一錢先令以被蓋煖藥勢  
熱足令微汗寢熟腫消一暈五服遂安 薛已治進士  
張德弘背疽初起微赤飲食少思用托裏藥膿成而潰  
再用大補湯之類肉生而斂忽寒熱作嘔患處復腫其  
脈浮大按之若無形氣殊倦薛謂之曰此胃氣虛憊非  
瘡毒也彼云侵晨登廁觸穢始作仍用補藥而斂 一  
人大背患疽年餘瘡口甚小色黯陷下形氣怯弱脈浮  
緩而瀦此氣血虛寒也用十全大補加附子少許數劑

而元氣漸復却去附子又三十餘劑全愈 一婦年五十餘四月初背當心生疽如栗大三日漸大根盤五寸許不腫痛不寒熱薛診其脈微而沈曰脈病而形不病者忌也實則痛虛則痒陰證陽證之所由分也不發不治潰而不斂亦不治乃與大補陽氣之劑色白而黯瘡勢如故至十二日復診其脈沈瘡勢不起神疲食減小便淋瀝乃與大補氣血加薑桂二劑瘡亦不起十五日因怒嘔泄並作服大補藥一劑瘡仍不起薛留藥二劑

而去病者昏憤不服或勸之省悟依方連進七劑十六日瘡起而潰色紅而淡膿亦如之十九日薛至喜曰瘡已踰險處但元氣消鑠尚可憂連與大補二十餘劑五月十一日病者因勞自汗口乾舌強太陽髮際腦頂俱脹復延薛至診之曰此氣血俱虛肝膽火上炎用補中益氣湯加山梔芍藥頓愈但內熱少睡手足發熱不時霍熱用逍遙散加山梔熱退復用歸脾湯瘡乃愈計瘡發及斂四十二日 內翰楊皋湖 少參史南湖之內

二條並見  
陽氣脫陷

一儒者年幾六旬仲冬背疽初起入房患

處黑死五寸許黯暈尺餘漫腫堅硬背如負石發熱作  
渴小便頻數兩耳重聽揚手露體神思昏憤脈沈而細  
右手為甚便秘二十七日計進飲食百餘碗腹內如常  
衆欲通之薛曰所喜者此耳急用大劑六君子加薑附  
肉桂三劑瘡始斂痛自後空心用前藥午後以六味丸  
料加參芪歸朮五劑復用活命飲二劑針出黑血甚多  
瘀膿少許背即輕軟仍用前藥便亦通利薛他往四日



神思復昏瘡仍黑陷飲食不進皆以為殞薛以參芪歸  
朮各一兩炮附子五錢薑桂各二錢服之即索飲食并  
鴨子二枚自後日進前藥二劑肉腐膿潰而愈 操江  
都憲伍松月背瘡愈後大熱誤為實火用苦寒藥一鍾  
寒熱益甚欲冷水浴身脈浮大按之全無薛曰此陽氣  
虛浮在肌表無根之火也急用六君加附子一劑即愈  
一男子背瘡不斂焮腫發熱小便赤澀口乾體倦脈洪  
數而無力用參芪歸朮熟地黃芍芍陳皮麥冬五味炙

草肉桂補元氣引虛火歸經脈證益甚此藥力未能及也再劑頓退却去肉桂又數劑而愈此證因前失補元氣故耳 憲副陳魯山年五旬居官勤苦勞傷元氣先口乾舌燥後至丙午仲夏發背疽漫腫中央色黯四畔微赤微痛脈舉之大浮按之微細左寸短而右寸若無十餘日腫未全起薛曰此屬病氣元氣虛寒當捨時從證朝用參芪薑桂歸朮陳皮半夏炙草溫補其陽夕用加減八味丸滋其肝腎各四劑而腐潰但膿水清稀盜

汗自汗內熱晡熱脈浮而數改用八珍湯復發熱而夜  
陽舉此腎虛而火妄動仍用加減八味丸料煎服而安  
又因怒動肝火瘡出鮮血二盞許左關弦數右關弦弱  
此肝木侮脾肝不能藏血脾不能統血也用十全大補  
兼用前藥料各二劑而血止再用前藥調理而痊 一  
人仲夏疽發背黯腫尺餘皆有小頭如鋪黍狀四日矣  
此真氣虛而邪氣實也外用隔蒜灸內服活命飲二劑  
其邪稍退仍純補其氣又將生脈散代茶飲瘡邪大退

薛因他往三日復視之飲食不入中央肉死大便秘結  
小便赤濁曰此間斷補藥之過也蓋中央肉死毒氣盛  
而脾氣虛大便不通胃氣虛而腸不能送小便赤濁脾  
土虛而火下陷治亦難矣急用六君加當歸柴胡升麻  
飲食漸進大便自通外用烏金膏塗中央一寸許四圍  
紅腫漸消中央黑腐漸去乃敷當歸膏用地黃丸料與  
前藥間服將百劑而愈 中翰鄭朝用背患發疽吐痰  
飲食無味肌肉不生瘡出鮮血薛曰此脾氣虧損不能

攝血歸源也法當補脾胃彼不信用消毒涼血加惡寒  
嘔吐始悟其言用六君加炮薑半夏茯苓數劑諸證悉  
退又令用十全大補瘡口漸斂後因飲食稍多泄瀉成  
痢此脾胃虛寒下陷用補中益氣下四神丸而痢止繼  
以六君子湯而瘡愈 封君袁懷雪背疽發熱作渴脈  
數無力用四物加黃檗知母玄參山梔連翹五味麥冬  
銀花脈證漸退又加白芷參芪腐肉悉潰因停藥且勞  
熱渴仍作乃與參芪歸芷炙草山藥山萸茯苓澤瀉肉

桂而安又以六味地黃丸及十全大補而斂 都憲周  
弘岡背患疽腫而不潰脈大而浮此陽氣虛弱而邪氣  
壅滯也用托裏散倍用參芪反內熱作渴脈洪大鼓指  
此虛火也用前散急加肉桂脈證頓退仍用托裏而愈  
若以為熱毒而用寒藥則誤矣 太僕王韻塘初起因  
大勞又用十宣散之類加喘渴內熱脈大無力此陽氣  
自傷不能升舉下陷於陰分而為內熱也薛以補中益  
氣加酒炒芍藥麥門冬五味子治之而愈 上舍張克

恭患此內服外敷皆寒涼敗毒遍身作痛欲嘔少食晡  
熱內熱惡寒畏寒薛曰遍身作痛榮衛虛而不能營於  
肉裏也欲嘔少食脾胃虛寒而不能消化飲食也內熱  
晡熱陰血內虛而陽氣陷於陰分也惡寒畏寒陽氣虛  
弱而不能衛於肌膚也此皆由脾胃之氣不足所致遂  
用補中益氣湯諸證漸退又以十全大補湯腐肉漸潰  
又用六君子湯加芎歸肌肉頓生而愈 儒者周兩峰  
懷抱久鬱背脊患疽肝脈弦洪脾脈浮大按之微細以

補中益氣湯加桔梗貝母少用金銀花白芷二劑肝脈  
頓退脾脈頓復乃以活命飲二劑膿潰腫消肝脈仍弦  
此毒雖去而胃氣復傷仍用補中益氣湯加茯苓半夏  
而愈 上舍蔡東之患此薛用托裏之藥而潰瘡口尚  
未全斂時值仲冬兼咳嗽薛曰瘡口未斂脾氣虛也咳  
嗽不止肺氣虛也法當補其母一日與其全宴見忌羊  
肉薛曰補可以去弱人參羊肉之類是也最宜食之遂  
每日不徹旬餘而瘡斂嗽亦頓愈矣 憲副屠九峰孟



春患此色黯漫腫作渴便數尺脈洪數此腎水乾涸當  
歿於火旺之際不信更用苦寒之藥復傷元氣以促其  
歿 京兆柴黼菴仲夏患之色黯微腫發熱煩躁痰涎  
自出小腹陰實手足逆冷右關浮澁兩尺微細薛曰此  
虛寒之證也王太僕云大熱而不熱是無火也決不能  
起懇求治之遂用大溫補之藥一劑流涎雖止患處不  
起終不能救 顧包泉老醫年六十有五因盛怒疽發  
於背大如盂四圍色黯召瘍醫治之用冷藥敷貼敷已

覺涼約曰七八日後為用刀去瘀肉顧俟其去曰四圍色黑乃血滯更加冷藥非其治也乃更治熱敷藥去舊藥敷之覺甚痒終夜明日色鮮紅焮腫亦消惟中起數十孔如蜂房一日許又覺惡心作噦視一人頭如兩人頭自診曰此虛極證也用參附大劑進二服視已正矣不數日竟愈

一婦因得子遲服神仙聚寶丹背生癰甚危脈散大而濇急以加減四物湯百餘貼補其陰血幸其質厚易於

收斂

腰部

腰疽

或問十四椎旁腰腎之間發疽何如曰此名連腎發即下搭也由房勞太過致傷腎水令人口乾寒熱大作百節俱痛急服勝金丹黃芪內托散活命飲加羌活黃芪治之稍緩潰爛透膜者死若見咳嗽嘔噦腰間似折不能俯仰飲食不納者死潰而膿水清稀腐爛腥穢迷悶

不醒厥逆者不治 一婦年逾七十腰生一瘤作癢異  
常疑蟲蝨所毒診脈浮數齊氏曰脈浮數反惡寒者瘡  
也翌日復診脈乃弱予謂未潰而脈先弱何以收斂況  
大便不通則真氣已竭治之無功固請不得已用六君  
子加藿香神麴飲食漸進大便始通更用峻補之劑潰  
而膿清作渴再用參芪歸芩麥門五味而渴止喜曰可  
無虞矣予曰不然不能收斂先入之言也彼疑更醫果  
歿 一人年十九腰間腫一塊無頭不痛色不變三月

不潰飲食少思肌肉日瘦此氣搏腠理榮氣不行鬱而為腫名曰濕毒流注元戎曰若人飲食疎精神衰氣血弱肌肉瘦榮衛之氣短促而澀滯故寒搏腠理閉鬱為癰者當補以接虛怯之氣遂以十全大補湯加香附陳皮三十餘劑始針出白膿二椀許仍用藥倍加參芪仍灸以豆豉餅漸愈彼乃急於速効內服敗毒外貼涼藥反致食少膿稀患處色紫復請予治喜得精氣未衰仍以前藥加遠志貝母白薇百劑而愈此或久而不愈或

膿水清稀當服內塞散及灸附子餅然後可愈 一婦  
年踰二十腰間突腫寸許肉色不變微痛不潰發熱脈  
大此七情所損氣血凝滯隧道而然當益氣血開鬱結  
更以香附餅熨之使氣血充暢內自消散若爾雖潰亦  
無危不聽乃服十宣流氣之藥氣血愈虛潰出清膿不  
斂而死 一婦產後腰間腫兩腿尤甚此瘀血滯於經  
絡而然不早治必作癰遂與桃仁湯二劑稍愈更以沒  
藥丸數服而痊 亦有惡血未盡臍腹刺痛或流注四

肢或注股內痛如錐刺或兩股腫痛此由冷熱不調或思慮動作氣乃壅遏血蓄經絡而然宜沒藥丸治之亦有或因水濕所觸經水不行而腫痛者宜當歸丸治之凡惡血停滯為患匪輕治之稍緩則為流注為骨疽多致不救府庠彭碧溪患腰疽服寒涼敗毒之藥色黯不痛瘡頭如鋪黍背重不能安寢耳聾目白面色無神小便頻澀作渴迷悶氣粗短促脈浮數重按如無余先用滋腎水之藥一劑少頃便利渴止背即輕爽乃

砭去瘀血以艾半觔許明灸患處外敷烏金膏內服參  
芪歸朮肉桂等藥至數劑元氣稍復自疑肉桂辛熱一  
日不用手足並冷大便不禁仍加肉桂及補骨脂二錢  
肉豆蔻一錢大便如常其肉漸潰更用當歸膏以生肌  
肉八珍湯以補氣血而愈 舉人顧東溪久作渴六月  
初腰患疽不慎起居瘡潰尺許色黯敗臭小便如淋唇  
裂舌刺七月終請治左脈洪數右關浮濇余謂先渴而  
患疽者乃腎水乾涸虛火上炎多致不起然膿水敗臭



色黯不痛瘡口張大乃脾氣敗而肌肉死也小便如淋  
痰壅喘促口乾舌裂乃脾肺敗而腎水絕也左尺洪數  
腎無所生也左關浮濇肺尅脾也況當金旺之際危殆  
速矣二日後果歿蓋此證既發於外兩月方歿者乃元  
氣虛不能收斂也若豫為調補使氣血無虧亦有得生  
者

或問一人患疽於腰胯之間肉色不變堅硬如石經月  
不潰者何如曰此名石疽屬少陽陽明二經積熱所致

邪毒固結元氣不足故不能起發活命飲加獨活羌活  
柴胡黃芪及紫金丹汗之壯實者八陣散一粒金丹下  
之老弱者十全大補湯人參養榮湯托之若黑陷不起  
麻木不痛嘔噦不食精神昏亂脈散或代者死神清脈  
和服臺閣紫微丸

纏腰火丹

或問遶腰生瘡累累如珠何如曰是名火帶瘡亦名纏  
腰火丹由心腎不交肝火內熾流入胸脘纏於帶脈故

如束帶急服內疎黃連湯壯實者一粒金丹下之活命  
飲加芩連黃檗外用清熱解毒藥敷之此證若不早治  
纏腰已徧則毒由臍入膨脹不食而死

治蛇纏瘡

右用雄黃研為末以醋調塗仍用酒調服凡為蛇傷  
及蜂蠆蜈蚣毒蟲類犬所傷皆可用之

證治準繩卷一百十